

**■ TRIBUNA POLITICA**

# La cultura ans unescha

DA MARTIN JÄGER,  
CUSSEGLIER GUVERNATIV

**M**algrà tut il pessimissem: La cultura svizra e natiralmain er la cultura grischuna vivan. Quai mussan las cifras che l'Uffizi federal da statistica ha publitgà ultimamain. Tenor quellas visitan var 70 pertschient da la populaziun regularmain occurrenz culturalas. Jau sez tutg'er tiers, jau fatsch quai schizunt fitg savens.

**E**n ils temps digitals vegn la cultura «classica» schizunt declarada sco morta. La retschertga davart il tema «lingua, religion e cultura» che l'Uffizi federal da statistica ha fatg per l'emprima giada l'onn 2014 mussa ussa però il cuntrari. Tenor questa enquesta van 70 pertschient da las Svizras e dals Svizzers almain ina giada per onn en il museum, en in concert u en il kino. Er il teater è anc adina fitg apprezzià: quasi la mesadad da las personas interrogadas giada l'art preschentà sin la tribuna. E mintga tschintgavla persuna visita regularmain occurrenz culturalas: trais u dapli giadas per onn.

**P**erò sa mussan grondas differenzas en quai che concerna la frequentaziun d'occurrenz culturalas: La gliעד da la citad è pli activa che la gliעד dal pajais, umans giuvens pli interessads che umans vegls. Quels taidlan musica pli-



tgunsch d'in disc cumpact che d'in computer. Il mintgadi senza musica n'è tuttavia betg imaginabel en Svizra. Quasi 20 pertschient da la populaziun chanta activamain – en il Grischun dastgassan quai esser cun garanzia anc dapli – 17 pertschient fan musica, nov pertschient sautan. Dal tutfatg senza musica van dal rest mo tschintg pertschient da las personas interrogadas tras la vita. I existan però preferenzas regionalas: En la Svizra tudestga vegn preferida plitgusch la musica classica, en la Svizra romanda chansons ed en la Svizra taliana jazz, func e country. Sch'i sa tracta da festividades han las Svizras ed ils Svizzers pli gugent festas plitgusch pitschnas e localas. Sco ch'i resulta da la retschertga prefereschan ellas ed els festas dal vitg, dal quartier e da l'uniun envers occurrenz grondas ed er envers festas tradiziunalas sco il di da la festa naziunala.

**L**as Svizras ed ils Svizzers vegnan cunzunt impe-

dids dal temp da far insatge cultural. Passa la mesadad da las personas interrogadas ha numnadamain inditgà ch'ellas consumassan dapli cultura, sch'ellas avessan il temp per quai. Remartgabel è er: var in terz sa vesa exclus dal manaschi cultural per mancanza da las finanzas. A quai poi fitg bain vegnir fatg frunt: La citad da Cuira enconuscha per exempel gia dapi var 10 onns la purschida da la carta da legitimaziun culturala ch'è vegnida sviluppada en semen cun l'ovra d'agid Caritas. Uschia vegn pussibilità a Cuira (ma er en auters lieus da la Svizra) a personas cun in pitschen budget da pudair profitar per in pretsch in zic pli bass da purschidas dal sector da la cultura, dal sport e da la furnaziun.

**N**ossa populaziun vegn pli gronda, pli veglia, pli multifara. Il rinforzament da la participaziun a la cultura, actualmain in dals chomps d'acziun strategics da la politica culturala da la confederaziun, è ina reacziun a questa sfida. Da rinforzar la participaziun a la cultura è er la finamira da nossa promoziun chantunala da la cultura. Per quai èsi vegnì formulà explicitamain en la nova lescha per promover la cultura che tut las gruppas da la populaziun duain avair la pussaivladad da sa participar e da prender part da la vita culturala.